



Акафист

**святым Царственным
страстотерпцам царю Николаю,
царице Александре, цесаревичу
Алексию, царевнам Ольге,
Татиане, Марии и Анастасии**

Кондак 1

Избрании Богом святии Царственнии великомученицы, Святой Руси небесные заступницы и о людех ея молитвеиницы предивнии, благоверный Царю Николае с Царицею Александрою и Царственными чады Алексием, Ольгою, Татианою, Мариею и Анастасиею, купно с великим старцем, пророком и чудотворцем Григорием, похвальное пение приносим вам с верою и любовью; / вы же, яко имущии дерзновение к прославленному вас Господу, оградите нас от всяких зол и бед молитвами вашими, да зовем вас:

Радуйся, святая осьмерице богоизбранных великомучеников, за Русь Святую пред Богом предстоящая.

Икос 1

Ангелов Творец и всея твари Царь и Господь, судьбы народов и царств по воли Своей

управляяй, воздвиже в Руси Святой род Царей благочестивых и избра ты, Царю Николае, с Семейством твоим и Другом Царевым старцем Григорием в жертву святую, всеусердную и благоприятную Господу.

Мы же, дивящися таковому о вас Божию произволению, во умилении поем вам:

Радуйся, Помазанниче Божий Николае, престола Царства Российскаго украшение;

Радуйся, Царице Александро, премудрых жен христианских красото и славо.

Радуйся, Царевичу Алексие, жертва непорочная, Богу принесенная;

Радуйтесь, истиннии невесты Христовы и страдалицы Ольго, Татиана, Мария, Анастасие.

Радуйся, человеце Божий пророче и чудотворче Григорие;

Радуйтесь, всем сердцем Христа возлюбившии и верность Ему даже до смерти сохранившии.

Радуйся, святая восьмерице богоизбранных великомучеников, за Русь Святую пред Богом предстоящая.

Кондак 2

Видя сердцеведец Господь твердое изволение твое верою и правдою послужити Богу и народу твоему, благоизволил еси помазати тя, боголюбивый Царю Николае, на Царство Российское; ты же приял еси венец Царский яко

послушание, Богом данное, и многия труды и скорби подъял еси ради богопредстояния и благоденствия Святой Руси, воспевая давшему ти благодать и силу ангельскую песнь: Аллилуиа.

Икос 2

Разумом светлым и сердцем чистым воле Божией повинуюся, яко благое иго Христово бразды правления Державы Российския приял еси, праведный Царю Николае. Наипаче же поревновал еси храмов и обителей иноческих созиданию, святых угодников Божиих прославлению и Православныя Церкви утверждению. Сего ради, ревность твою в служении Царском прославляюще, зовем ти таковая:

Радуйся, от юности сердце твое Господеви предавый;

Радуйся, Помазанниче Божий, Духом Святым осененный.

Радуйся, Самодержец, скипетр Царский достойно носивый;

Радуйся, Царское служение со страхом Божиим совершавый.

Радуйся, душу твою за веру, народ и Отечество положивый;

Радуйся, нетленным венцем от Царя Царей увенчанный.

Радуйся, святая восьмерице богоизбранных

великомучеников, за Русь Святую пред Богом предстоящая.

Кондак 3

Силою свыше укрепленный, тяжкий крест служения Богу, Отечеству и народу твоему мужественно подъял еси, святой Царю Николае; такожде и всем народам православным заступник явился еси, егда воздвиг славное воинство русское во спасение единоверных страны Сербския, на брань победоносную против врагов России и Православия. О сем воспеваем укрепившему тя Богу: Аллилуиа.

Икос 3

Имущи в сердце твоём твердое упование на всеильную помощь Божию и пламенное желание Святой Руси послужити, глагола еси благоверный Царю Николае: несть тоя жертвы, юже аз не принесл бы благо Отечества моего. Такожде научи и нас за Христа и Русь Святую души своя полагати, заповедь любви исполняюще, и воспевати тебе, святче Божий, похвалы сия:

Радуйся, Третьего Рима державный столпе и ограждение;

Радуйся, людям и странам православным добрый покровителю.

Радуйся, закона и правды непоколебимый

хранителю;

Радуйся, лукавья советы врагов России презревший.

Радуйся, словесам богомудрым старца Григория всем сердцем внимавай;

Радуйся, купно с Семейством твоим скорби народа понесший.

Радуйся, святая восьмерице богоизбранных великомучеников, за Русь Святую пред Богом предстоящая.

Кондак 4

Бурю искушений лютых воздвиже отец лжи диавол на Царство твое, Помазанниче Божий, дабы злобою, клеветою и коварством богоотступников погубити Русь Святую и Веру Православную. Ты же, Государь благоверный, братоубийства в Державе твоей избегнути чающе, данную ти власть и славу оставил еси, умоляя Господа, да сохранит во Святой Руси верных Богу и поющих Ему: Аллилуиа.

Икос 4

Слышаще и видяще Отечества твоего разорение, молился еси, кроткий Царю, да спасет Пресвятая Богородица Дом Свой Русь Святую, и се явился образ Ея, именуемый «Державная», идеже прият Царица Небесная скипетр и державу из рук отверженного народом Царя

земнаго. И бысть сие явление в радость велию
всем верным, поющим тебе похвальная:
Радуйся, Царский венец на терновый
пременивый;
Радуйся, смирению Христову с любовью
подражавый.
Радуйся, якоже Иов многострадальный
праведность в скорби явивый;
Радуйся, покрову и заступлению Матери Божией
страну твою вручивый.
Радуйся, Царскую порфиру кровию своею
обагривый;
Радуйся, с Семейством твоим и старцем
Григорием единомудро на Голгофу возшедый.
Радуйся, святая восьмерице богоизбранных
великомучеников, за Русь Святую пред Богом
предстоящая.

Кондак 5

Богосветлою звездой явилася еси, славная
Царице Александро, приявши веру
Православную и всем сердцем возлюбившая
молитву, храмы Божии и святых отец творения.
Такожде во благочестии воспитала еси чада твоя
и угодовала еси их в жертву благоприятную и
непорочную за Христа, воспевая Ему
благодарственную песнь: Аллилуиа.

Икос 5

Видя любящий Господь крепость веры твоея и силу терпения, пречудная Царице Александро, дарова тебе вкупе с возлюбленным супругом твоим и чадами вашими чашу горьких страданий испити и мученический венец прияти. Ты же, подражающе закланному Агнцу Христу, кротко вся претерпела еси и во обители горния душею возлетела еси. О сем, поминающе вольныя страдания твоя, святая Царице и матери, воспеваем ти таковая:

Радуйся, в сиротстве твоём Материю Божией восприятая;

Радуйся, Феодоровскому образу Владычицы посвященная.

Радуйся, любовью пламенной Богом одаренная;

Радуйся, православных святынь почитательнице.

Радуйся, с супругом твоим в любви и благочестии пожившая;

Радуйся, Царственным чадам твоим матери любвеобильная.

Радуйся, святая восьмерице богоизбранных великомучеников, за Русь Святую пред Богом предстоящая.

Кондак 6

Проповедницы славы Божией и ревнители истиннаго благочестия явились еси, святии

Царственный супруги Николае и Александро, и образ брака благословеннаго, союза любви святаго покажете возлюбленным чадам вашим и всем чтущим вас; да воспевают благодарственно прославльшему святость вашу Богу: Аллилуиа.

Икос 6

Возсияли еси во Святой Руси, яко звезды, боговенчаннии супруги Царю Николае и Царице Александро, праведным житием вашим, в делах любви, милосердия, веры; вы бо чад ваших во благочестии и любви воспитали еси; с ними же в заточении от богоборцев сущи, веру, надежду и любовь к Богу сохранили есте и, мученическую кончину претерпевше, причастницы Царства Небеснаго соделаетесь. Темже, яко Святой Руси покровители, молитесь Бога о спасении Отечества вашего и всех, с любовью чтущих вас и поющих вам сицевая:

Радуйтесь, истинный образ супружества христианского явившии;

Радуйтесь, любовь небесную в житии своем показавшии,

Радуйтесь, нищих и убогих милостивии покровители;

Радуйтесь, смирением Христовым щедро украшении.

Радуйтесь, изгнанныи правды ради, яко ваше

есть Царство Божие;
Радуйтесь, яко мзда ваша многа на Небесех.
Радуйся, святая восьмерице богоизбранных
великомучеников, за Русь Святую пред Богом
предстоящая.

Кондак 7

Хотя человеколюбец Господь радость явити
людem российским, дарова им светлаго отрока
Царевича Алексия, дивнаго молитвенника и
заступника нашего.

Сей бо во смирении сердца глагола еси: аще бы
мне царствовать на Руси Святой, да не
обрящутся в ней скорбнии и нищие, но все
счастливы будут. Егда же многия недуги, скорби
и убиение от богоборцев претерпев, в Царство
Небесное возшел еси, великомучениче святыи,
тамо прославльшему тя Господу радостно воспел
еси ангельскую песнь: Аллилуиа.

Икос 7

Новое знамение благоволения Своего ко Святой
Руси яви тя Господь, Царевичу Алексие, яко плод
благословенный молитв Саровскаго чудотворца,
надежду, славу и упование всех людей
православных, Божиим же произволением, яко
агнец непорочный, мученическую кончину от
безбожных восприял еси и ныне ликуеши яко
наследник Царства Небеснаго. Сего ради,

победным венцем украшенного и с лики
новомучеников и исповедников Российских
прославленного, ублажаем тя поюще:
Радуйся, преподобному Алексию Человеку
Божью тезоименитый;
Радуйся, святых князей-мучеников Бориса и
Глеба и царевичу Димитрию достойный
сонаследниче.
Радуйся, юнейший ратник в воинстве отца
твоего;
Радуйся, болезнь тяжкую, яко крест, смиренно
понесший.
Радуйся, молитвами старца Григория от смерти
избавленный;
Радуйся, ангельскую чистоту житием твоим
явивый.
Радуйся, святая восьмерице богоизбранных
великомучеников, за Русь Святую пред Богом
предстоящая.

Кондак 8

Странно есть людем христолюбивым видети,
како странствие земное совершив и путь
страдальческий прошед, дщи Царева,
равноапостольней Ользе тезоименитая, веры
ради мужественно на смерть себя предаде за
Владыку Жизни Христа. Сего ради,
мученический венец прияв, Царевна святая

Ольго, со ангелы Престола Божию предстоиши, воспевая Ему победную песнь: Аллилуиа.

Икос 8

Вси небеснии чины и святых земли Российская собори радостно прияша вас, великомученицы Царственнии с великим старцем Григорием, подвиг земнаго жития вашего прошедшии и жизнь вечную унаследовавшии. И вся Церковь Христова восхваляет любовь вашу и служение во славу Господа и Пречистыя Его Матери, мира Заступницы, молитвенно память вашу празднует и песни хвалебныя приносит вам: Радуйтесь, добродетелем святых предков ваших подражавшии; Радуйтесь, народу вашему даже до смерти послужившии. Радуйтесь, милости и сострадания к людем преисполненнии; Радуйтесь, вдов и сирот питатели и заступницы. Радуйтесь, клеветы, изгнание и поругание смиренно претерпевшии; Радуйтесь, силою Божией на подвиг страдальческий укреплении. Радуйся, святая восьмерице богоизбранных великомучеников, за Русь Святую пред Богом предстоящая.

Кондак 9

Всякое естество ангельское удивися терпению и мужеству твоему, святая Царевна Татиано, ты бо всяких добродетелей преисполненная и покровительнице твоей, святей мученице Татиане, подражая, с молитвою предала дух свой в руке Божии и в Царство Небесное вошла еси, идеже со Ангелы и всеми святыми воспеваеши Богу песнь: Аллилуиа.

Икос 9

Ветии искуснии не могут достойно воспети чудное прославление ваше, святии Боговенчаннии великомученицы; исполнися бо проречение преподобнаго старца Серафима Саровскаго, яко прославльшаго его Царя прославит Бог.

Такожде провещанием праведнаго старца Николая Псковоезерскаго, прослави вас Господь на небеси купно со святым мучеником старцем Григорием, живот свой за Царственныя Друга своя положившим. Мы же, чтуще память вашу, во умилении сердца взываем сие:

Радуйтесь, Христа в сердцах ваших носившии;
Радуйтесь, вся печали ваша на Бога возложившии.

Радуйтесь, заповедь любви до конца исполнившии;

Радуйтесь, мученический подвиг славно скончавший.

Радуйтесь, от руки богоборцев смерть без ропота приявший;

Радуйтесь, крестным подвигом вашим людей русских в вере укрепивший.

Радуйся, святая восьмерице богоизбранных великомучеников, за Русь Святую пред Богом предстоящая.

Кондак 10

Спаси хотя душу свою, святая Царевно Марие, яко агница Божия к смерти себя приуготовила еси, покаянием теплым душу очистила еси и приобщением Тела и Крови Господней соединилася еси Царю Славы Христу, даровавшему ти с Царственным Семейством твоим и человеком Божиим Григорием живот вечный, да присно воспеваеши Ему победную песнь: Аллилуиа.

Икос 10

Стену неборимую и покров благодати дарова Господь Руси Святой, яко благоприятными молитвами вашими, благовернии Царственнии великомученицы, с дивным старцем Григорием, спасаете Отечество ваше от всех врагов видимых и невидимых. Сего ради и мы благодарение Христу усердно возсылаем и вам,

небесным предстателем нашим, хвалу приносим,
вопиюще:

Радуйтесь, Святой Руси Богом дарованнии
заступницы;

Радуйтесь, вся концы ея светом небесным
озаряющей.

Радуйтесь, яко молитва ваша столп огненный
есть от земли до небеси;

Радуйтесь, чудеса безчисленными по смерти
прославлении.

Радуйтесь, в нуждах и бедах сущих скорое
избавление;

Радуйтесь, о всем мире христианством молитвы
Господу возносящи.

Радуйся, святая восьмерице богоизбранных
великомучеников, за Русь Святую пред Богом
предстоящая.

Кондак 11

Пение всехвальное приносит ти Земля Русская,
святая Царевна Анастасие, с Семейством
Царственных великомучеников и старцем
Григорием, яко от уз греха предстательством
вашим свободдаемся и милость у Господа
обретаем. Темже и ныне в бедах и напастех к
вам прибегая и на заступление ваше уповающе,
единеми усты и едином сердцем непрестанно
взываем Благодеющему нам Богу: Аллилуиа.

Икос 11

Светоподательнии светильники, светом любви Христовой и чудесами дивными Святую Русь просвещающими, зрим святую восьмерицу Царственных великомучеников с чудотворцем старцем Григорием; сего ради, сиянием небесным славы ваша озаряеми, в радости прославляем Господа, прославльшаго вас, и воспеваем песнями таковыми:

Радуйтесь, Трисиянным Светом озареннии;
Радуйтесь, Творца своего и Господа присно созерцающии.

Радуйтесь, с Царицею Небесе и земли о всем мире молящиеся;

Радуйтесь, с небесными силами Бога прославляющии.

Радуйтесь, светильницы, любовью Божией горящии;

Радуйтесь, мрак душ наших благодатию озаряющии.

Радуйся, святая восьмерице богоизбранных великомучеников, за Русь Святую пред Богом предстоящая.

Кондак 12

Благодать неизреченную дарова тебе сердцеведец Господь, святой мучениче старче Григорие, из среды народа простаго ко Престолу Царскому возшедый и всему миру велию силу

Божию показавый; яко никто и никогда не
возможет творити тех чудес, ихже ты сотворил
еси, и явити таковую любовь, юже ты явил еси,
аще не пребудет с ним Духом Святым
Всемогущий Бог. О сем радуясь и подвиг твой
прославляя, воспеваем Ему: Аллилуиа.

Икос 12

Поюще дивное предстательство ваше к Богу,
святии Царственнии великомученицы, купно со
старцем Григорием, величаем дивнаго во святых
Своих Царя Небеснаго, ублажаем мученическую
кончину вашу и почитаем вас яко
молитвенников великих за Русь Святую и всех
людей православных, ихже любовь Христовой
возлюбили еси. Веруем, яко дадеся вам
благодать души погибающей спасти и на путь
истинный наставляти всех, велегласно славящих
вас:

Радуйся, святой Царю Николае, крест
умученнаго старца Григория на груди своей
носивый;

Радуйся, святая Царице Александро, образ
вернаго Друга на медальоне изобразившая.

Радуйся, святой Царевичу Алексие, человека
Божия угодником святым почитавый;

Радуйтесь, святии Царевны Ольго, Татиано,
Марие, Анастасие, послания старца, яко
святыню, до смерти хранившии.

Радуйся, святой избранниче Христов старче Григорие, верою и смирением великия духовныя дары стяжавый;

Радуйтесь, агнцы непорочнии, жертвою крестной страну нашу от погибели спасшии.

Радуйся, святая восьмерице богоизбранных великомучеников, за Русь Святую пред Богом предстоящая.

Кондак 13

О, предивнии в страданиях ваших святии угодницы Христовы, скорые помощницы всем, с верою и любовью к вам прибегающим;

приимите малое сие моление наше и сохраните Русь Святую Православную и людей ея, вся грады и страны христианския от губительства, глада, труса, потопа, огня, меча, нашествия иноплеменных и междоусобныя брани, наипаче от лукаваго обольщения антихристова.

Умолите Бога даровати нам всенародное покаяние и грехов оставление; да избавльшеся от вечныя смерти молитвами вашими, узрим грядущего Православнаго Царя и радостно воспоем Богу: Аллилуиа.

Сей Кондак читается трижды, затем Икос 1-й и Кондак 1-й



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

†

НОВОЕ
* НЕБО